



MENTERI KANAN PERTAHANAN
MALAYSIA

KENYATAAN MEDIA

1 SOP DAN 9 GARIS PANDUAN DI FASA 'PERALIHAN KE ENDEMIK'

1. Lebih dua tahun negara terpaksa berperang dengan pandemik COVID-19 serta pelbagai impaknya, bukan sahaja daripada sudut perubatan, tetapi juga ekonomi dan kesihatan mental. Biarpun kita belum menang sepenuhnya namun kita juga tidak lagi dikuasai sepenuhnya oleh virus ini.
2. Semalam YAB Perdana Menteri, Dato' Sri Ismail Sabri Yaakob telah membuat pengumuman penting dan besar iaitu negara akan memasuki Fasa 'Peralihan ke Endemik' berkuatkuasa 1 April 2022. Ini bakal menjadi permulaan baharu buat negara.
3. Selain pembukaan sempadan negara yang dinanti-nantikan rakyat terutama yang sekian lama terpisah dengan suami, isteri mahupun ahli keluarga, **penting juga untuk kita semua ambil maklum bahawa dalam Fasa ini, terdapat 1 Prosedur Operasi Standard (SOP) dan 9 Garis Panduan. Ia merupakan salah satu daripada 7 Tonggak yang paling penting di fasa berkenaan terutama dalam usaha negara menuju kehidupan yang hampir normal.**

1 PROSEDUR OPERASI STANDARD (SOP)

4. Secara asasnya, 1 SOP di Fasa 'Peralihan Ke Endemik' ini telah dipermudahkan daripada 181 SOP Pelan Pemulihan Negara (PPN). **Biarpun hanya 1 SOP, namun ia masih AKAN DIKUATKUASAKAN di bawah Akta 342 bermula 1 April ini.**
5. 1 SOP tersebut mengandungi 10 keperluan iaitu:
 - i. Memakai **pelitup muka** ketika di tempat awam.
 - ii. **Waktu operasi** mengikut lesen/permit.
 - iii. Menjaga **kebersihan tangan**.
 - iv. Melakukan ujian pengesanan COVID-19 berdasarkan **National Testing Strategy**.
 - v. **Menguruskan kes yang disyaki atau disahkan** mengikut garis panduan Kementerian Kesihatan Malaysia (KKM).
 - vi. Menggunakan MySejahtera dan MySJTrace untuk **pendaftaran kemasukan**.



MENTERI KANAN PERTAHANAN
MALAYSIA

KENYATAAN MEDIA

- vii. Memastikan **penjarakan fizikal 1 meter**.
 - viii. Memastikan **pengudaraan** dan sistem ventilasi yang baik.
 - ix. Memastikan **kebersihan premis**.
 - x. Mematuhi **keperluan vaksinasi** untuk aktiviti tertentu.
6. Kesemua 10 keperluan ini sudah biasa diamalkan oleh orang ramai dalam Fasa Pelan Pemulihan Negara (PPN). Atas sebab itu, saya percaya setiap lapisan masyarakat boleh untuk terus melaksanakannya dengan sebaik mungkin.

9 GARIS PANDUAN

7. Dalam pada itu, seiring dengan Fasa 'Peralihan ke Endemik' di mana kita harus belajar hidup bersama dengan virus COVID-19 dan lebih mengutamakan disiplin sendiri, adalah amat penting untuk kita memahami risiko penularan COVID-19 serta mengamalkan langkah pencegahan.
8. Susulan itu, selain 1 SOP, 9 Garis Panduan juga telah dibangunkan bagi membantu rakyat membuat pilihan lebih selamat ketika menjalankan aktiviti harian demi menjaga keselamatan diri, keluarga dan orang sekeliling.
9. Penting untuk saya maklumkan, **9 Garis Panduan ini TIDAK AKAN DIKUATKUASAKAN**. Sebaliknya, ia menjadi panduan yang **AMAT DIGALAKKAN** untuk dipatuhi supaya rakyat dapat kekal berwaspada dengan risiko jangkitan COVID-19 apabila melakukan aktiviti-aktiviti tertentu.
10. 9 Garis Panduan ini merangkumi:
 - i. Pengangkutan dan Perjalanan
 - ii. Pendidikan dan Penjagaan
 - iii. Aktiviti Peruncitan, Makanan dan Minuman
 - iv. Ruang Kerja Tertutup
 - v. Kawasan Kerja Terbuka
 - vi. Acara, Majlis, Hiburan dan Tarikan Pelancong
 - vii. Hotel dan Penginapan Tetamu
 - viii. Keagamaan, Perkahwinan dan Pengebumian
 - ix. Aktiviti dan Fasiliti Sukan, Rekreasi & Riadah.
11. Untuk setiap Garis Panduan berkenaan, terdapat dua perincian iaitu cara penilaian risiko penularan COVID-19 serta gejala COVID-19 dan cara mengamalkan SOP dengan betul.



MENTERI KANAN PERTAHANAN
MALAYSIA

KENYATAAN MEDIA

12. Bagi memudahkan lagi masyarakat memahami dengan lebih lanjut 1 SOP, 9 Garis Panduan serta Fasa 'Peralihan Ke Endemik' secara keseluruhannya, satu laman sesawang dengan kerjasama rapat Majlis Keselamatan Negara (MKN) sedang dibangunkan dan telah pun dalam peringkat akhir. Ia dijangka dapat diakses dua minggu sebelum 1 April sekaligus boleh membantu masyarakat membuat persiapan sebelum fasa tersebut bermula. Saya akan maklum kepada umum apabila laman sesawang berkenaan telah boleh diakses.
13. Setinggi-tinggi penghargaan kepada seluruh ahli Keluarga Malaysia yang mendokong setiap usaha Kerajaan menangani COVID-19. Ini termasuklah mematuhi SOP serta mendapatkan suntikan vaksin dan dos penggalak. Keupayaan negara memasuki Fasa 'Peralihan Ke Endemik' 1 April ini merupakan hasil usaha bersama. Marilah kita meneruskan momentum yang baik ini demi melindungi diri dan insan tersayang daripada COVID-19.

PENGERUSI MESYUARAT MENTERI KUARTET COVID-19
9 MAC 2022